

UTSHIMAU

Shanut Rich

Eukuan utshimau-atanukan tshe atshimak.

Eukuan inanu shikuanapinanipan anite, matukapa takuana inanu. Ek^u tshek ekue nitautshit anite innu itakanu, napeu. Ekue papamutet anite katshi tshishi-nitautshit, tanite musheshkateu, apu umatshunishimit. Ekue natak anite papiushakanishapani miam matshunisha inanu. Nenu ma uiapatak itakanu pitu-anakapeshakana e piushuakanniti, ekue issishuet itakanu :

— Upitu-anakapeshakanian mak au !

Ekue upitu-anakapeshakanit itakanu. Ekue shash taniti upitu-anakapeshakana.

Minuat upatshuianish atamit. Nianatuapatak minuat piushauannu tshipa ishinakuannu. Minuat ekue mishkak, ekue takuanniti itakanu nenua atamit umatshunishima.

— Anite atamit upitushkakanianakue ! issishueu itakanu.

Ekue upitushkakanit anite minuat, itakanu.

Ek^u pepamutet minuat, nanatuapatam^u nenu itakanu matukapit anite. Ekue nitautshinnit mani, ekue takuannit mani tshe itashpishut. Anakapeshakanuian, eukuan piaushakanikue, inanu. Ekue uapatak ne napeu, ekue utinak.

— Tshima utanakapeshakanian ! iu.

Ekue utanakapeshakanit shash tapue, mishta-minushinua
utanakapeshakana.

Minuat kie anite ne utshimaukup ui ishi-papiushakanishapan. Minuat iapit
uapatam^u :

— Utshimaukupianakue ! iu itakanu.

Ek^u minuat, uetshimaukupit itakanu. Kassinu kie utashtisha
kie utasha kie utakunishkueun, kassinu takuannu inanu. Muk^u nenu itenitam^u,
itakanu, e papiushakanniti nenua matshunisha, eukuannua nenua uiauapatak.

Ekue tshituteht. Anite ka shikuanapishiht innuat, pushuat netshenat
itakanuat. Iapit nete ashtunuat. Ek^u eshtuniht anite akamit. Ek^u ne utshimau,
eukuan ne uetshimaut etashinanut anite innua. Tiepueut innu :

— Natauk^u ! ishi-tepuetak.

Ek^u itakanuat anitshenat ishkuessat (nishipanat ishkuessat itakanuat
anitshenat eka ka nipuht) :

— Nataumek^u, itakanitshenat, maniteu matapetak itakanu !

Ekue natauaht itakanuat. Nishukamuat ishkuessat.

— Tan, tshutshimaunau a au ? itikuat meshakauaht nete akamit.

Tshutshimaunau a uet natauiek^u ?

— Mauat, apu utshimauiat. Ne nitshimakan eukuannua uetshimauniti
utauia, iteu.

— Uetshimaut ua nataukushian, iu ne utshimau.

Eukuan shash tshaueuht ishkuessat, apu petaunaht nenua umanitemuaua.
Ek^u iteuat ishkuueuat nete uiapamaht :

— Tanite eka petauneuti nenua umanitemuaua, itakanuat, maniteua ka matapeniti ?

— Tshakuan tshitikuau ? itakanuat meshakaht.

— « Uetshimaut nui nataukushin », issishueu.

Ekue uitamuakanit nahi. Ashtunipan itakanu shakuanapinannut, ashtunipan nana utshimau, nana uetshimaut anite innua (ma peikussikupan utshimau mani, peikussu tanite utshimau eitinanuti). Ekue natat. Itakanu :

— « Uetshimaut nui nataukushin », issishueu.

— Utshimautshenitakushu a an, iteu, shuk^u ua utshimaua nataukushit ?

— Eshe, itakanu, tshitshue utshimauashpishu.

— Eshe, iteu. Nika natauau.

Ekue patshitinamuat nenua, ashtunipan itakanu. Ekue patshitinak nenu. Ek^u epushit. Ek^u niatauat tapue, peikukashu, shash tanite aieshkukapaunua.

— Tshutshimaun a ? itiku pet meshakamipanit.

— Eshe, iteu, nin kanapua uetshimauian.

— Ek^u pimit anite itakumu, itiku.

Ekue kuashkuetshikauniti. « Ka-minapanuana », ekue ishimamat itakanu. « Tsheshka nitaishimamatshe », ekue itat mani. Ekue tshitaunat. Nete ma minuat, « iapit eukuan itakumu » ekue itashumikut nenua, ka itakumut nenu, ua kapaniti nenua, ka pushiniti ka itakumut. Ek^u nenu iapit kepaniti, eukuan itakumu ekue itashumikut, itakanu nenua napeua. Ekue iapit eukuannu etakumuat. Ek^u kuiashkuetshikauniti. Iapit eukuannu eshimamat nenu, « shuk^u ka-uitshetuana », ishimameu. Ekue kapaue-kuashkutit ekue akuanak utush ne napeu. Ekue itutet nete utashtunauat.

Anitshenat ishkuemat niatikuht nenua napeua, nenua meshakaniti
utshimaua.

— Tshekuannu tshe piminutak^u ? itakanu.

— Umikunu piminutatau, umikuapukatatau.

Ek^u uemikutsheshiht itakanuat anitshenat kukuminassat, uemikutsheht,
uemikuapukataht. Ek^u (apu anite tanite pitukamit) iama tshashtenit umikuapum
nenu peminutakanit. Ek^u tshe ashamakanit, shash peshinakuannu, itakanu. Ek^u
itenitam^u itakanu ne : « Tshima uiesh issishuenanut anite, nipa unuin. » Tshak ma
itakat itakanuat anite unuitimit auassat :

— Tan eshinakushit ma ne pishim^u ! Ne ma pishim^u tan eshinakushit !

Shash muk^u upiu itakanu ne utshimau. Ekue unuit.

— Tan an nika uapamau pishim^u ? issishueu itakanu.

Ekue nete aiakuashk^u tshitutet itakanu. Nete ma uet
patshititat ushkat, ushkat peik^u patshititau mak utitshi, minuat utanakapeshakana.
Nutim shash pikupanu. Minuat uiau kie utakunishkueun, ekute etashtenit. Ek^u
eshpish eka tat.

— Natuapamek^u mak au ! itakanuat anitshenat ishkuessat.

Ek^u netuapamaht, ekue mitimeht nenu umeshkananu ka ituteniti.

Etashteniti massina itakanu.

— Nin nika umassin nishish, iteu, tshe eka nipauian.

— Eshe, itiku.

Ekue utinak itakanu. Minuat ekue tshituteht. Apu minekash pimuteht, shash minuat uapatamuat : ashtisha apinua.

— Nin nimish nika utashtishin, itiku, tshek ma nipauiani.

— Eshe, iteu.

Ekue tapue utinaniti. Minuat apu minekash pimuteht, minuat anakapeshakana uiapamaht, eukuannu anakapeshakana nutim uiapamaht.

— Nin nishish nika minu-apatshiau, iteu, nin tshe nipauian.

— Eshe, itiku.

Ekue minuat utinat itakanu. Minu-apatshieu nenua anakapeshakana. Minuat akunishkueunnu ekue takuannit kie utshimaukupinu, eukuannu mashten eshtenit.

— Nin nimish nika minu-apashtan, iteu, tshe eka nipauian.

— Eshe, itiku.

Ekue utinak tapue, nutim ekue minu-apashtat. Ekue tshieht. Shash tanite apu taniti nete ushte, eukuannu eshkuapannit nenu, ekute anite pakupanniti nenua umanitemuaua. Ekue tshieht.

Nikamuat tshaueht itakanuat. Ek^u ne : « Tshiminu-tutenanashapan »,
ishitueuat itakanuat, nenu nekamuht.

Petuetamuat nete, uitshuat nete ishi-nikamuat pietuakaniht.

— Ka-nikamutakati, ka natuapamaht umanitemuaua,
itakanuat.

— Apu tat nana, ekue itaht itakanuat tekushiniht, apu tat
nana ka nashautshit. Muk^u umatshunishima nuapatamuanan, itatshimuat
itakanuat.

